

Mizoram Rambuai

Ni 28.2.1966 Pathianni zanah MNF hmalaknain Mizoramin zalenna a neih theih nan beihpui thlak runpui chu urhsun takin a bul an tan a, chu chu Operation Jeriko an ti a ni awm e. Tichuan ni 1.3.1966 ah Independence an puang zui ta a. India sorkar laipui beng a thleng rang hle a. India sipai leh MNF an inkap a, Mizoram a buai ta a, Independence puangtu zinga a phusa deuhte pawh a theih theih an man baw a.

Kum 1966 March ni 2 zanah Chanmari, tuna Veraz dawr kawtah sipai duty an ambush a, an thi nual a. A tuk ni 3 ah an thinrim chu an ralthuam nen mipui min rikrap nan an inlar ta chiam mai a. March ni 4 zanah chuan sipai leh MNF te zankhuain an inkap a. March ni 5, 1966, a lo thlen chuan Jet Fighter paliin Aizawl leh Zoram hmun dang thenkhat Hnahlan te, Khawzawl te, Sangau te, Tlabung te a bomb a. Kan khawpui Aizawl chu meivapah a chang a. Bomb a thlak lohna ahte pawh fighter chu hniam te te ah thlawkin Mizo mipuite a tih thaih a, mipuite hlau leh thlabarin an khur a. Hmun him lam nia an hriat, ramhnuaiah te an tlan darh chum chum a ni. (Source: Prof JV Hluna)



Ka Pi (Solfathangi) titi:

Khatia India Fighter ten Aizawl an Bomb a, an kah alh puat puat tum khan ka Pi te In, Tuikhuahtlang, Aizawl a mi pawh a kang ral ve vek a. Hetih hunlai hi ka Pi te chhangchhiat vanglai tak a ni baw a. A fate pali an piang tawh a, a u ber pawh kum 8 a la pum lo a. Chutiang taka chhangchhe chung chuan India fighter ten Aizawl an bomb alh puat puat kha an hmachhawn a ni.

Nikhat chu “MNF ten Aizawl a India sipai an la dawn a, mipuite hmun him lamah lo riak ang che u” tih thu chu an hre ta a. Hmun him lam ni a an hriatah an riakchhuak ta a, mahse chu pawh chu a la him tawh lo an tih leh zel takah chuan mipui tam tak chuan hmun him lam an pan leh a. Chhungkaw pa tan a mangan thlak a, nu nau an thla bar em em baw a. Chutia an buai mup mup karah chuan ka Pi leh an pa chu an in hloh palh hlauh mai lehngal a. Midang ten hmun him lam an pan sup sup laiin, mangang leh thlabar takin kalna lam tur hre lovin an awm hnufual deuh reng a. Nakinah chuan ka pi te chu an pa nen an inhmu leh ta hlauh mai a. MNF leh India sipaite inkah rik tuk tuk na karah hmun him deuh zawk lam panin an zui chhuak hnak hnak a. Ka Pi chuan a fa naupang ber a pua a, a nau ber dawt a

pawm a, a u te pahnih chu a kai a, Pa berin mamawh dang a pu bawr luk bawk a. Tichuan naunawi nen Sikulpui lam chu an pan ve ta a ni. Sikulpui an thlen chuan mi thahnem tak an lo awm tawh a.

Sikulpui ah chuan chu ti zat zat chu awm reng theih a ni si lo a, kal chhuah leh a ngaih takah chuan Mission vengthlang lam chu an pan leh ta a, Pu Khuma te Inah chuan an lut ta rawih a, chhungkaw dangte pawh an lo lut ve nual bawk a. Pu Khuma te chhungkua hi an fel em em a, an In a lutkhawm zawng zawngte eiturin Chaw leh Dailuah an chhum teuh a, an zavai chuan an ei ho thin a ni. Nakin deuhah chuan an awmna pawh chu a him lo an ti leh ta a, Mission veng ho leh an luhna In neitu Pu Khuma te chhungkua ngei pawh chu Reiek lamah an tlan chhe leh hlawm a. Chutia Pu Khuma te ngei pawh an tlanchhiat leh tawh hnuah pawh, Pi Soli te chhungkua erawh chu an chhangchhiat em avangin hlau chung chungin Pu Khuma te inah chuan an la awm ngar ngar a. Jet Fighter ten Aizawl leh a chhehvel an rawn kah rik dum dum lai chuan, Pu Khuma ten bihrukna tura an khur laih (Trench), la laih zawh mumal loh ah chuan naupang ho nen chuan an tawm khawm thin a. Puitling mah thlabar taka an awm chuan, naupang tan chuan hlauh loh chi zia zang a ni lo, tap chul chungin khurah chuan an lut a, Fighter chuan bomb a rawn thlak a, a ri tuk tuk a, tichuan a rawn thlawk ri rum rum reng mai a. Chumi hlau chuan nu ber hovin kut lukhupin "awi ah, awi ah.." tiin an au chul a, naupang naupang ho hlau thlabar chuan nu ber chu an bawh rawn chuk chuk reng lo thei lo si a. Fighter a kal kiang deuh tihah an chhuak leh thin a, chutiang reng reng chuan hun an hmang a ni.

Mission veng mipui leh an luhna In neitute ngei pawh an tlanchhiat tawh avang leh a hlauhawm em avang chuan ka Pi te chhung pawh chuan, chhang chhe hle mah se Pu Khuma te In chu awm reng na chi ah an ngai lo va, Tlungvel lam pan an rilruk ve ta a. Chutia Jet Fighter ten Aizawl an rawn kah zan chuan, thim thamah Pu Khuma te huan mawng Mau hmun ah chuan chhangchhe bawr tak chungin an tawlh chhuk a, huan mawng a kawngpui chu an zuk pawh ta a. Chu kawng chu an zawh a, Ngaizel lam panna kawng a lo ni a. Chutih lai chuan Tuikhuahtlang lam chu a kang nasain a khu dum nguk nguk mai a. Ngaizelah hian khua a var tawh a, chuta tang chuan zingkarah an chhuak leh a, Kelsih ah Sangkhumi pa Inah an lut leh ta rawih a, zanriah te an ei ta a.

Ka pi te Kelsih khua a an va luhna pa (Sangkhumi pa) chu a lo tha em em a. Chutia nunau nena hlau thlabar a an hnen thleng ta chu a lo lainat em em mai a, "Ar ka talh ang che u, chaw ei lo chuan in kaltlang ka phal lo" a ti a, Ar a talh a, tui ti takin an ei ho ta a ni. Hemi tum hian ka Pi te chu Pu Liankhuma te chhung nen an inzui a, anni pawh hi naupang nen an bawr ve hle bawk a. Kelsih atanga an chhuah leh hnu hian Phaibaw kawnah zan an riak a, tlan chhe ve dang pawh an lo awm nual a. Ka pi te hi chhangchhe ngang an ni a, mi Inah mikhualin an riak leh a. A tuk khua a lo var a an han thochhuak chu, an zinga naupang tel ve, Pu Liankhuma fapa chuan, "E heu.., tute nge In min lo sak sak le? a ti he-haw a,". India Jet Fighter ten an In te an kah chhiat sak a, a kan ral vek tawh avang leh ramhnuaiah thimthamahte an kal avang khan, khatia In chhung lum atanga zing an han tho chhuak kha naupang ta chuan a hrethiam lo va, mak a ti hle a ni awm e. Tichuan engemaw titi in Tlungvel chu an thleng thei ta a ni....

.....duh tawh phawt ang.....